

Lai Dyènnainat'tyètèye

Les véyes aivînt raicontè c'ment qu' des dgens qu' vétçhînt aivâ, tot prés d' lai r'viere étînt paitchis in pô pus hât dains lai côte, è câse des ennâvaïdges qu' détrujînt aidé tot. Dâli, ès vétçhînt dains in p'tèt l' haimé, en mé lai côte, dâs craibîn pus d' in mill'nâ. È n' y aivait ran qu' quéques p'téts bacus po les dgens pe po les bêtes, â moitan d'in éssapeut, â long d'in p'tét reûché qu' yô aippoétchait d' lai boinne âve. Ènne neût (è y aivait d' çoli ènne vintainne d' années) lai montaigne était tchoé aivâ dains in terribye traiyîn. Poi tchaince, l' aivaleu n' était p' v'ni djainqu' és bacus, mains èl aivait r'tçhevie ènne grôsse paitchie d' l' éssapeut. Taint bîn qu' mâ, d'aivô brâment d' coéraidge, ès s' étînt r'botès â traivaiye, èls aivînt boy'vattè des moncés d' roétches è pe d'tiere d'vaint d' poéyait r'vengnie. Mains voili qu' aiprés quéques s'nainnes, lai dou s' était tairi ! Lai crovèe d' l' âve était v'ni éroéynainne. Les hannes daivînt moinnaie tchètche djoué les bêtes djainqu' en lai r'viere po les faire è boire, pe raippoétchaie des pâjaints sayats d' âve qu' èls aivînt fâte po yôs. Èls aivînt bîn épreuvè d' creûyie in échpèche d' étaing tot prés des bacus, mains è n' pieuvait p' prou po l' rempiâtre. Les dgens, chutôt les djûenes s' étînt sôlés â traivaiye, ès s' n' étînt p' poéyu aivéjie. Les pus véyes étînt moûes, les pus djûenes étînt tus paitchis d' aivô quéques bêtes po épreuvaie d' s' allaie étabyi âtre paît. L' Dyéne, lu, n' aivait dj'mais v'lu tçhittie ci cære de tiere. È diait aidé : i seus tchoé â monde ci, chus ç'te tierre d' nôs véyes dgens, ç' 'ât ci qu' i dais vétçhie è pe meuri. D'aivô sai fanne, èl aigongé de d'moéraie chus ci cære de tiere d' yôs ancêtres. Ès n' aivînt pus ran qu' doûes vaïches qu' yôs bèyînt di laicé, qu' dous poûes qu' yôs feunéchînt in po d' tchie. Èls aivînt âchi quéques lédyumes â tietchi, pe quéques dg'rainnes è quéques laipîns, pe c'était tot. Èls aivînt prou d' âve po les dous, d'aivô lai pieudge qu' ennâvait l' moitan di p'tét l' étaing. Mains sai fanne âchi aivait meuri, dâli mitnaint, è d'moérait tot d' pai lu. In bé djoué, è païché bîn laivi d' aivô son soûeta dains lai montaigne. En bîn des yûes, èl aivait aivu di mâ d'péssaie. È câse des roétchies obîn tiaïnd qu' le bôs était épâs, èl aivait daivu faire d' grôs détoués. Tot d' in côp, è tchoyé chus ènne dou qu' l' âve était bîn çhaïre. Ç' 'ât craibîn l' âve d' note reûché qu' l' aivaleut é dépiaicie tiaïnd qu' lai montaigne 'ât tchoé. Son saïng n' fsé qu' in toué. Ch' i veus sâvaie lai vétçhaince chus ci cære de tiere, è fât dépiaicie l' haimé, obîn creuyie in raïgat po aimoinnaie l' âve djainqu' en note étaing. È y' sannait qu' lai dou était en aimont d' l' haimé. Lai neût poétche consaye qu' 'è s' dié. En r'veniaïnt vés son bacu, è n' rébié p' de piaïntaie des pâs totes les vinte pésses en déchendaïnt tot bal'ment. Qué croûeye de neût èl é péssè. Qu' 'ât-ç' qu' était l' pus soïe ? Mains c' était tot d' meinme mâ fait d' aïbainnaie l' haimé, chutot qu' èl aivait vengnie di soïe â bontemps ! Pe ç' n' était p' vés ç'te dou qu' ses ancêtres aivînt mâj'nè les bacus ! Â cheuyaint maitîn, sai déchijion feut prije. È r'venié vés lai dou, en poétchaint ch' ses épales ènne pâle, in creu pe ènne haïtchatte. D' aivô coéraidge, èl ècmencé d' éssapaie in péssou pe d' creûyie l' raïga en cheuyaint les pâs. L' détouénè reûché nenttayait l' bout qu''était dj' fait, pe aimoéhléçhait lai tierre en aivâ. L' âve s' aïppretchait tos les djoués in pô pus d' l' haimé. È poyé meinme creûyie des p'téts bouts d' tèrrâ en aïppiaïyaint ènne vaïche en in échpèche de véye ritte. Poi in bé maitîn, è n' demoérait pus qu' quéques mètres è creûy'naie djainqu' en l' étaing. È s' était y'vè en lai pitçhatte di djoué, pe s' était boté è pieutchie, è pâlaie, è r'vâlaie. Èl aivait tiute de voûere l' âve rempiâtre l' étaing, â long di bacu. Vés les dieche, è maindgeait in moéché d' pain moéyie dains ènne étçhéyatte de laicé, tiaïnd qu' è voyé s' aïppretchie dous djûenes dgens, ènne baïchatte pe in tot djûene hanne... qu' aïttieuyînt quaitre tchievres pe dous cabris. Mon Dûe s' dié-t'-é, po chur qu' i seus fô. È n' aivait pus niun vu dâs l' djoué d' lai moûe d' sai poûere fanne, è y aivait craibîn trâs l' ans. Bondjoué qu' dié lai baïchatte, i seus ç't' Ainatte pe lu, ç' 'ât ci Tiètyîn, ç' 'ât mon aimoéreu. L' d'rie mois, nôs païrents sont moûes des bossattes. D'vaint d' meuri, ès nôs aïnt djâsè d' in Dyéne pe d' âtres dgens qu'

vétçhînt dains in l' haimé, è mé côte dains lai montaigne. Ès nòs aint fait è promâttre de r'v'ni ci, chus ç'te bnâchu tiere d' nòs ancêtres, lai vi des malhèyes d' lai pèchte. Ât-ç' qu' vòs n' srîns p' ci Dyéne ? Bîn chur qu' i seus l' Dyéne, qu' è réponjé tot tiaimu, mains c'ment qu' s' aipp'lait ton père ? Mon père dié l' Ainatte, c'était ci Dgeoùrdges des gròs l' Aînes. Ci pouère Dgeoùrdges, dié-t-é en pûeraint !

Lai baîchatte saivait tot mitnaint. Èlle se tchaimpé dains les brais di Dyéne en l'embraissaint pe en y' diaint : grant-père !

Sôt'ni poi l' brais d' sai p'tête-féye, l' véyaid emmoigné les dous djûenes vés l' reûché laivoù qu' è pujé ènne étçhéyatte d' âve, pe r'venié in pô aivâ des bacus, â pie d' ènne crou, chus lai fòsse d' lai Tçhait'rine, lai grant-mère d' l' Ainatte. È prayé Dûe, b'nâché l' âve, en tchaimpé ch' lai fòsse pe saigné les djointes mains des dous djûenes en yòs diaint : Â nom de Dûe, i vòs b'nâs. Mitnaint vòs êtes mairiès, vòs vétçhrés dains ci l' haimé, pe vòs airèz brâment d' afaints.

Djainqu' â meûcie di s'raye, l' Dyéne r'viré pus d' cent côps di bacu en l'étaing, di reûché â bacu. Tot l' djoué, èl aivait ravoétie l' Ainatte qu' botait l' bacu en oûedre di temps qu' le Tiètyîn r'vâlait lai fin di reûché djainqu' en l' étaing, d' vaint d' faire bé és bêtes. L' soi, l' âve rempiâchait tot bal'ment l' étaing. Lai tâle aivait trovè ènne oûere de fête d'aivô des ptés boquats d' cramias. Aiprès d' grantes l' annès, lai boinne è tchâde sope r' femait dains ènne étçhéye pe dains les trâs aissietes. An djâsont d' ci temps qu' aivait péssè dâs lai tchoite d' lai montaigne, tiaind qu' ne l'Ainatte ne l' Tiètyîns n' étînt encoé tchoés â monde.

D'vaint d' s' allaie coutchie, l' grant-père pe les djûenes dgens s' tniaint poi lai main, s' aidg'nonyainnent â long di nové reûché. En engoulaint de ç'te b'nâchu l' âve ès diainnent ensoinne : Adjed'heû nòs t' baptèyans. Te t' aappel'rés lai Dyènnat'tièye !

J-M. Moine